

1 Pedru

Īsazei'wa norĩ ma, Pedru te te ĩrob'ui'éré na'rata zé Ībaihâ wasu'uzé

Ā Ībaihâ hã Pedru te te ĩrob'ui'éré hã Zezusihi zazei'wa norĩ hã daro mono bâ 're ĩsi'ubumroi mono norĩ ma, ma tô rob'ui'éré, ĩsazei'wa 're nomro mono 'ru te, da te tãma 're ĩrob'manharĩ za'ra mono norĩ ma. Īsazei'wa norĩ hã danhib'rata te te 're robzépata za'ra mono wa, ma tô Pedru hã tin-himi'ui'éré na pê'ēhiri za'ra. Taha na ma tô pawap-tob za'ra, siptete sina Zezusihi āma si 're nomro mono da. Cristu hã wanhowa te te ĩrobzépata na hã ma tô duré tãma waihu'u za'ra, duré wa norĩ hã ĩsire 're wanomro mono wa, za ĩsine wa te 're ĩrobzépata za'ra mono zém na hã. Āne ma tô duré tãma waihu'u za'ra: 'Re ĩhâimana u'âsi mono hã ma tô te te 're aipibu za'ra wa'wa, tô sena 're umnhasi za'ra wa'aba mono zô.

¹ Wa hã Pedru, Zezu Cristu te te ĩpisudu, ĩsadawa wasu'u'wa 're ĩmorĩ da. Āhãna wa za āma aima rob'ui'éré za'ra wa'wa, 'Re ĩhâimana u'âsi mono nhib'a'uwē norĩ ma. Aiom nhiti te dawazari 're aihâimana za'ra wa'aba mo, danhipti'a nho'ōmo mono bâ, Pōtu āma, duré Darasiza āma, duré Capadosiza āma, duré Azi'a āma, duré Bitinha āma.
² Aipoto za'ra wa'aba ō ré, ma tô Wamama hã sima aipisutu sirōmo za'ra wa'wa, 'Re ĩhâimana u'âsi mono hã, ĩsib'a'uwē oto 're anomro aba mono da. Taha da, ma tô oto Tipē'ēzani hã aipē'ē 're aima

sõmri za'ra wa'wa, aiwẽ uptabi na oto õhõ ãma si 're anomro aba mono da, duré Zezu Cristuhu nhimiroti si 're wapari pese za'ra wa'aba mono da, duré Cristu hã dazada ìdâ'âzéb zarina, aipẽ'ẽ 're te te 're ai'a'upsõi wa'aba mono wa, aiwasété ãna ãma 're anomro aba mono da oto.

'Re ìhâimana u'âsi mono ma, wa ai'ãma 're ìmreme u'âsi za'ra wa'wa, ìsimizawizé hã ai'ãma 're hâimana u'âsi za'ra wa'aba mono da, rowẽ u'âsi, ãma 're anomro aba mono da, taha ãma si.

Rowẽ uptabi zô, 're ìdanhimipari za'ra mono zé wasu'u

³ 'Re ìhâimana u'âsi mono ãma si oto 're wawata u'âsi za'ra wa'aba mono, Wanhìb'apito Zezu Cristuhu mama ãma. E marĩ wa. Ìpẽ'ẽzézé hã sa'ëtẽ na tãma 're hâimana mono wa, ma tô wa'apoto té, wapẽ'ẽ 're, wahâimanazép té ìwẽ na si oto ãma 're wahâimana za'ra mono da. Zezu Cristu hã dâ'â uptabi nherẽ, ma tô Ìmama hã ab're hawi hâiwa'utu, tiwaihu'u pese na. Taha zarina, wa za duré wasina sô 're wanhimipari za'ra, 're wadâ'â za'ra mono pari, te te 're ìwa'ahâiwa'utu mono zéb zô. ⁴ Nimahã na, te za marĩ hã ìwẽ hã te te wama 're anhomri, tinhìb'a'uwẽ norĩ zô te te 're ì'ab'madâ'â mono hã hâiwa ãma. Tame ìwẽ uptabi si te asô 're simi'wara u'âsi 'wa, dawi 're ìsi'utõrĩ waihu'u za'ra mono õ hã, dawi 're ìwasété za'ra mono õ hã duré. ⁵ Ate za'ra wa'aba da, te ìwẽ hã asô 're hâimana u'âsi za'ra wa'wa. A norĩ wa'wa hã ìwaihu'u pese na te oto asina 're ì'umnhasi za'ra wa'aba mo. Taha wa, te za ìwasété wi te te 're ai'madâ'â pese za'ra wa'wa, asõ'reptui wa'aba zé hã asina uwaimrami za'ra wa'aba da, ro ìsi'utõrĩzéb ãma.

⁶ Taha wa, te za ĭwasu'uwě zarina aipě'ě 're, 're atoi u'âsi za'ra wa'aba mo, rowasédé hã asada 're hâimana za'ra wa'aba mono wa, 're robzépata za'ra wa'aba mono nherě. ⁷ Wanhíb'apito umnhasi sina 're aihâimana za'ra wa'aba mono zô, te za rowasédé hã asada 're hâimana za'ra wa'wa. Wanhíb'apito Zezu Cristuhu ma, wě di, Wanhíb'apito umnhasi sina 're aihâimana za'ra wa'aba mono zé hã. Ětě'ubuzi pré oru hã dama ĭsawi pese zém nhipai u, tãma wě di. Ětě'ubuzi pré oru hã wa'âbâ za'ětě wa, dama sawi pese di, ta hã dama 're hâimana u'âsi mono dai ō nherě. Zata ō zô, te za unhamá wa hiri ni, zata ō wa, da te ĭwaihu'uzéb da hã, oru uptabi na. Tane, a norĩ wa'wa hã rowasédé hã asada 're hâimana za'ra wa'aba mono nherě, Wanhíb'apito umnhasi sina 're aihâimana u'âsi za'ra wa'aba mono wamhã, apâ wei morĩ wapsi, te za danho'a ai'ãma tiwata za'ra wa'wa, ōhō umnhasi sina ãma 're ĭ'aihâimana u'âsi za'ra wa'aba mono zém na. Tame te za duré marĩ hã ĭwě hã aima sōmri za'ra wa'wa. Rowě uptabi hã te za duré aima pisutu za'ra wa'wa. Tawapsi, aima 're rowě uptabi za'ra wa'aba mono di za oto. ⁸⁻⁹ A norĩ wa'wa hã atōmo na asiwi 're 'madâ'â za'ra wa'aba mono ō di, Zezu Cristu hã. Tane nherě, aima sawi uptabi za'ra wa'aba di, Wanhíb'apito hã. Atōmo na asiwi 're 'madâ'â za'ra wa'aba mono ō nherě, te Wanhíb'apito umnhasi sina 're aihâimana za'ra wa'aba mo. Taha wa, aima 're rowě za'ra wa'aba mono wa, te aipě'ě 're, 're atoi u'âsi za'ra wa'aba mo, ato za'ětě za'ra wa'aba na. E marĩ wa. 'Re aihâimana wasété za'ra wa'aba mono zém hawi, te te 're asō'reptu za'ra wa'aba mono wa. Taha da, te Wanhíb'apito hã asina 're ĭ'umnhasi za'ra wa'aba

mo, te te 're asõ'reptu za'ra wa'aba mono da.

¹⁰ Duréihã aibã norĩ hã te 're hâimana za'ra, 'Re ãhâimana u'âsi mono zadawa wasu'u 'rata 'wa hã. Ta norĩ hã danho'reptuzé wasu'u te te waihu'u pese za'ra da, ma tô te te sô 're rosa'rata za'ra. ãwana ré ma tô te te dama 're rowasu'u sirõmo za'ra, danho'reptuzém na, 'Re ãhâimana u'âsi mono za te te aima ãma 're ã'a'uwa'imrami za'ra wa'aba mono zém na. ¹¹ ãne te ta norĩ hã te te sima 're nharĩ za'ra: "E 'wa hã, Danho'reptui'wa za. E niwa te za tawamhã te te 're da'anho'reptu." ãne te ta norĩ hã te te sô 're rosa'rata pese za'ra, te te waihu'u za'ra da. Cristuhu pê'êzani hã ãpê'ê 're, 're hâimana za'ra mono wa, ma tô tãma waihu'u sirõmo za'ra, Cristu hã za te te ãrobzépatazém na. Taha pari, rowẽ uptabi hã hãiwa ãma za tãma 're ãhâimana mono na ma tô duré tãma waihu'u sirõmo za'ra. ¹² 'Re ãhâimana u'âsi mono, ma tô duré ãne hã tãma waihu'u sirõmo za'ra: "Aima wa'aba si, te waihu'u za'ra wa'aba õ di, danho'reptui'wai wasu'u hã. Ai'uirĩ na wa'aba, za 're ãdahâimana za'ra mono norĩ pibu ma, wa tô ãne hã aima waihu'u sirõmo za'ra wa'wa." ãne ma tô tãma waihu'u za'ra, aipibu ma za'ra wa'aba zama. Wanhib'apito zadawa wasu'u'wa norĩ hã ma tô oto rowasu'uwẽ na aipo're pu'u za'ra wa'wa, Cristu te te 're ãda'anho'reptui mono zém na. Hãiwa hawi, Wanhib'apito pê'êzani nhimipawaptobzéb zarina, tô sena Cristuhu wasu'uwẽ na ma tô aipo're pu'u za'ra wa'wa. Taha wasu'u hã wẽ uptabi wa, te oto hãiwa ãma romhuri'wa norĩ hã te te sima 're wẽ uptabi za'ra, te te 're waihu'u pese za'ra mono da.

'Re ãhâimana u'âsi mono, dahâimana wẽ da, te te 're

ĩda'apisutu mono zé wasu'u

¹³ Zezu Cristu hã nimahã na te za wei mo apâ. Taha wa, te za aihâimana nhimiza'rese 're aihâimana za'ra wa'aba mo. Aihâiba na te za 'râwi 're asi'madâ'â za'ra wa'aba mo. Zezu Cristu hã apâ wei morĩ wapsi, te za aima 're ĩrowẽ za'ra wa'aba mono zé hã aima pisutu za'ra wa'wa, hâiwa ãma. Taha zô si te za asina 're asimipari u'âsi za'ra wa'aba mo. ¹⁴ Taha wa, te za 'Re ĩhâimana u'âsi mono nhimiroti hã 're ĩwapari pese za'ra wa'aba mo. ĩsimiroti hã 're waihu'u za'ra wa'aba mono õ ré, ma tô marĩ hã ĩwasété zô si 're ĩrowasutu za'ra wa'aba mo. Taha zarina 're anomro aba mono õ di za oto. ¹⁵ 'Re ĩhâimana u'âsi mono hã ma tô sima aipisutu za'ra wa'wa, ĩsib'a'uwẽ si oto 're anomro aba mono da. Ta hã hâimana wẽ uptabi na, te 're hâimana. Taha wa, te za a norĩ wa'aba zama, aihâimana wẽ uptabi na oto 're aihâimana za'ra wa'aba mo, ĩsine. ¹⁶ Duréhã ma tô ãne siwasu'u, 'Re ĩhâimana u'âsi mono hã:

“Wa hã ĩhâimana wẽ uptabi na, wa 're ĩhâimana. Taha wa, a norĩ wa'aba zama te za aihâimana wẽ uptabi na 're aihâimana za'ra wa'aba aba mo, ĩsine.”

Ãne ĩsimiroti na rob'ui'éré, ĩbaihã na hã.

¹⁷ A norĩ wa'wa hã, 'Re ĩhâimana u'âsi mono ma 're aimreme zusi aba mono wamhã, Wamama na te 're ĩsisi za'ra wa'aba mo. Ta hã dahâimanazéb zarina da'ãma rowairébé'wa, te 're hâimana. Ãhã wa, 're ĩdahâimana za'ra mono zéb zarina, te za dahâiba mono bâ te te dama ãma 're a'uwaimrami, dahâimana wẽ zém na, dahâimana wasété na zama. Taha wa, te za 're ĩhâimana mono zém na asiwi 're ĩwazéb za'ra wa'aba mo, Wamama hã, ti'ai ãma 're anomro aba mono ré. ¹⁸ A norĩ wa'wa hã ma tô

ĩwaihu'u za'ra wa'wa, aiwa'âbâ za'ra wa'aba zé hã. Cristu hã ma tô aiwa'âbâ za'ra wa'wa, 're anomro wasété aba mono zém hawi, te te 're asõ'reptu za'ra wa'aba mono da, aihirata norĩ ne, 're aihâimana za'ra wa'aba mono tõi da oto. E rob'uiirazém na ma tô Cristu hã aiwa'âbâ za'ra wa'wa, e êtẽ'ubuzi pré oru na, niha wamhã, e ĩ'a na prata na. Mare di. Ta hã wẽ u'âsi 're hâimana za'ra mono õ di za. Taha na te te aiwa'âbâ za'ra wa'aba õ di. ¹⁹ Dazada idâ'ázém na si ma tô aiwa'âbâ za'ra wa'wa, ĩwapru hã tiwi ĩpu'uzém na. Ta hã te 're mo, pone'ërebâ ĩwẽ uptabi ne, da te dasiwi ĩwĩrĩ da hã, dawasété wa, dawa'âbâzéb da. Cristu hã wẽ uptabi na 're ĩhâimana mono hã ma tô tidâ'ázém na aiwasédé hã wa'âbâ za'ra wa'wa. Ta hã te te ĩwawa'âbâ za'ra zé hã wẽ uptabi di. ²⁰ 'Re ĩhâimana u'âsi mono hã te te ro'apoto mono õ ré, ma tô Cristu hã pisutu siro, dazada dâ'â da, dawasété wa'âbâzéb da hã. Āhãna ro ĩsi'utõrĩzéb u hã, ma tô we datẽme wi oto Cristu hã, aima ãma 're ĩrowẽ za'ra wa'aba mono zéb da hã. ²¹ Cristu hã dâ'â uptabi nherẽ, ma tô ab're hawi hâiwa'utu, 'Re ĩhâimana u'âsi mono hã, rowẽ uptabi te te tâma pisutu da, hâiwa ãma. Āhã wasu'u hã aima waihu'u pese za'ra wa'aba wa, te oto õhõ si asina 're ĩ'umnhasi za'ra wa'aba mo, te te dama ĩropisutuzé hã te te aima ãma uwaimrami za'ra wa'aba da.

²² Wanhib'apito nhimiroti hã, tô sena. A norĩ wa'wa hã ma tô ĩsimiroti hã 're ĩwapari pese za'ra wa'aba mo. Taha wa, marĩ ĩwasété na asima 're rosa'rata za'ra wa'aba mono õ di oto. Aiwẽ na 're anomro aba mono da si, te oto asima 're ĩrosa'rata za'ra wa'aba mo. Dazawizé hã tô sena te oto aima 're hâimana za'ra wa'wa, asiré Wanhib'apito

zazei'wa norĩ ãma. Taha wa, te za õne u'âsi 're asisawi pese za'ra wa'aba mo. ²³ 'Re ãhâimana u'âsi mono zadawa wasu'u hã pire na te 're hâimana u'âsi. Niwa si'utõrĩ waihu'u õ di za. Ta hã ma tô oto timreme na aipoto téb za'ra wa'wa aipé'ê 're, ã'ra si oto 're anomro aba mono da. Ti'ai ãma damama norĩ si te za nimahã na dawĩ 're si'utõrĩ za'ra. Tanei õ di, Aimama 'wa hã aipé'ê 're te te 're aipoto téb za'ra wa'aba mono hã. Niwa dame si'utõrĩ waihu'u õ di. ²⁴ Duréihã ma tô ãhã wasu'u na ãma rob'ui'ééré, 'Re ãhâimana u'âsi mono zadawa wasu'u'wa hã. ãne te rowasu'u:

“Du hã 're wapti'i hã za'ra mono õ ré, te za 're 'ré za'ra. Duré romnhirãã norĩ hã wẽ nherẽ, te za 're sirãã a'a za'ra. Tane duré dahãiba hã wẽ nherẽ, te za 're dasi'utõrĩ su'u. ²⁵ Tanei õ di, uburé Danhib'apito nhimiroti hã. Pire na te 're hâimana u'âsi. Niwa si'utõrĩ waihu'u õ di za.”

ãne ãma ãrob'ui'ééré hã.

Tawamhã Wanhib'apito wasu'uwẽ na da te 're aipo're pu'u za'ra wa'aba mono wamhã, ma tô uburé Danhib'apito nhimiroti wasu'uwẽ na te te aima 're rowasu'u za'ra wa'wa.

2

¹ Taha wa, te za aiwasédé hã 're ãrẽme pese za'ra wa'aba mo, dasi'ruiwapari hã, duré dazadawa nhipe hã, duré dahãimanazé tô senai'õ hã, duré danhimarĩ na dasi'ruiwapari hã, duré dasima dawasu'u wasédé hã. ² Ai'uté ãpoto té hã tina hãiwa'u zõ 're ã'ry'ry mono ne, te za Wanhib'apito nhimiroti zõ 're ãrob'ruiwapari za'ra wa'aba mo, ãma 're asiptete za'ra wa'aba mono da, aihãimana wasété hawi asõ'reptuzé hã 'rãwi oto asina 're

waihu'u za'ra wa'aba mono da. ³ Wanhib'apito dama 're ĩsõpru mono zé hã 'râwi asina 're waihu'u za'ra wa'aba mono wa, wa ãne aima waihu'u za'ra wa'wa.

Ëtê na Cristuhu ãma te te ãma ĩsimiré'ézé wasu'u

⁴ Ma'ãpé, Wanhib'apito u asimirosa'rata na si nherê, 're aihutu aba mono. Ta hã wê nherê, ma tô dasiwi wê'õ ni, êne hã 'ri'wa norĩ te te siwi ĩwê'õ ne. Tane nherê, da te dasiwi wê'õ nherê, 'Re ĩhâimana u'âsi mono ma, wê uptabi di, Wanhib'apito hã. Tãma sawi uptabi di duré. ⁵ Ëne ahâ nherê, 'ri hã da te dasiwi ãma ĩ'ri ne, te za 'Re ĩhâimana u'âsi mono hã te te aima 're nharĩ za'ra wa'wa, ĩsõrõwa na tãma 're aihâimana u'âsi za'ra wa'aba mono da. E marĩ da. ĩsõrõwa ãma tãma ĩromhuri'wa norĩ ne, sasedoti norĩ ne, tãma ĩromhuri'wa 're aihâimana za'ra wa'aba mono da, duré aihâiba na tãma 're asõprub za'ra wa'aba mono da. Zezu Cristu wazada ĩdâ'âzéb zarina, tãma 're asõprub za'ra wa'aba mono wamhã, Wamama ma wê di, tãma 're ĩ'asõprub za'ra wa'aba mono zé hã. ⁶ Duréihã ĩwana ré 'Re ĩhâimana u'âsi mono, ma tô êtê na Zezu Cristuhu ãma simiré'é. ãne te tinha:

“Ëtê tōmo wawê hã wa tô pisutu, ĩnhorõwa ãma te hiri da, Si'ã na 'ri nho'õmo nhisi ãma. 'Ri na'rata wê'êzéb ãma wa za tihĩ, 'ri hã siptete na sab da. Ëne hã ĩma wê uptabi di. ĩma sawi uptabi di duré. Taha umnhasi sina 're dahâimana za'ra mono wamhã, ĩwê na za te te dama ãma 're a'uwaimrami u'âsi mono wa, dawĩ 're robzei'õ za'ra mono õ di za.”

ãne ãma ĩrob'ui'éré hã, ĩbaihã na hã.

⁷ Ëtê na ïsisi hã aima sawi uptabi za'ra wa'aba di, Cristu hã, Danho'reptui'wa na asina 're umnhasi za'ra wa'aba mono wa. Da te dasina 're ï'umnhasi za'ra mono ò norĩ ãma, ma tô 'ri'wa norĩ ãma simiré'é, 'Re ïhâimana u'âsi mono zadawa wasu'u'wa hã. ãne te ta norĩ ãma rowasu'u:

“Ëtê tomhâpâ wẽ hã 'ri na'ratazéb da hã, wẽ uptabi nherẽ, wasété newa, 'ri'wa norĩ te te aré siwi ïwẽ'õ hã 'ri na'rata uparizéb da, te oto 're sa'wari u'âsi, pire na.”

Ãne ïwasu'u na rob'ui'ééré hã. ⁸ Duré êtê tōmo wawẽ wasu'u amo na rob'ui'ééré hã, ãne:

“Ëne hã te za nasi da'marõpãrĩ za'ra.”

Taha na rob'ui'ééré hã, ãne. Ëne te te nasi da'marõpãrĩ za'ra wamhã, dama 're rowẽ za'ra mono ò di za. Tane Cristuhu wasu'uwẽ hã da te 're saze za'ra mono ò wamhã, dama 're rowẽ za'ra mono ò di za, 'Re ïhâimana u'âsi mono hã te te siwi 're ïda'awẽ'õ mono zéb zarina.

⁹ Tanei ò di, a norĩ wa'wa hã. 'Re ïhâimana u'âsi mono, ma tô sima aipisutu za'ra wa'wa, ïsib'a'uwẽ si oto 're anomro aba mono da. Sasedoti norĩ hã te te sima 're ï'apisutu mono ne, te oto a norĩ wa'wa hã uburé Danhib'apito ma romhuri'wa, 're anomro aba mo, õhõ ãma si 're anomro aba mono da, ïte da. Ta hã robra hawi ma tô rowa'a u sitême asô tihârâ za'ra wa'wa, 're anomro wasété aba mono zém hawi, rowẽ uptabi na si 're anomro aba mono da oto. Taha wasu'u na, tiwaihu'u pese na te te aima ãma 're ï'uwaimrami wẽ za'ra wa'aba mono zém na, ma tô sima aipisutu za'ra wa'wa, ãma 're dapo're pu'u u'âsi za'ra wa'aba mono da. ¹⁰ A norĩ wa'wa hã 'Re ïhâimana u'âsi mono nhib'a'uwẽ 're anomro aba mono ò di aré. ãhãna te oto ïsib'a'uwẽ tãma 're

aihâimana za'ra wa'aba mo. Duré da'ãma 're ãpẽ'êzé mono zé hã asina 're waihu'u za'ra wa'aba mono ò di aré. Æhãna ma tô oto asina ãwaihu'u za'ra wa'wa, da'ãma 're ãpẽ'êzé mono zé hã.

Dahâimana wẽ zém na rowasu'u

¹¹ Ìsisânawã norĩ, ãma asawi pese za'ra wa'aba norĩ hã, darom nhiti 're ãdahâimana za'ra mono ne, te 're aihâimana za'ra wa'aba mo, ti'ab ré. Taha wa, marĩ wasété na 'rãwi asima 're rosa'rata za'ra wa'aba mono ò di za, asimirosa'rata wasété zarina 're 'manharĩ za'ra wa'aba mono tã da, aiwasété 'wa hã. ¹² A norĩ wa'wa hã Wanhib'apito zazei'õ'wa norĩ wazari, te 're aihâimana za'ra wa'aba mo. Taha wa, te za aihâimana wẽ na si dama 're aihâimana za'ra wa'aba mo. Tawamhã aihâimana wasété na, taré da te aima 're nharĩ za'ra wa'aba mono nherẽ, te za da te 're aiwaihu'u za'ra wa'wa, dama 're aihâimana wẽ za'ra wa'aba mono zém na. Tawamhã Cristu hã apã wei morĩ wapsi, te za 'Re ãhâimana u'ãsi mono ãma tawata za'ra ni, ãsimiroti zarina aihâimana wẽ na, dama 're aihâimana za'ra wa'aba mono wa.

¹³ Wanhib'apito nhib'a'uwẽ oto 're anomro aba mono wa, uburé dama ãpire norĩ nhimiroti hã te za 're ãwapari pese za'ra wa'aba mo. Taha wa, ti'ai ãma danhipai u da'madã'ã'wa nhimiroti hã te za duré 're ãwapari pese za'ra wa'aba mo. ¹⁴ Duré tãma da'madã'ã'wa da, te te 're ãda'apisutu mono norĩ nhimiroti zama, te za 're ãwapari pese za'ra wa'aba mo. ãhâimana wasété norĩ hã, ãsadowa para te te 're hã za'ra mono da, duré ãhâimana wẽ norĩ ãma 're wata za'ra mono da, taha da, ma tô ta norĩ hã pisutu za'ra. ¹⁵ 'Re ãhâimana u'ãsi mono hã ma tô sima aiwẽ za'ra wa'wa, aihâimana wẽ na dama

're aihâimana za'ra wa'aba mono da. E marĩ da. Aihâimana wẽ na dama 're aihâimana za'ra wa'aba mono nherẽ, taré da te aima 're nharĩ wasété za'ra wa'aba mono tō da. ¹⁶ Pawa'âbâ ãna dama romhuri'wa norĩ ne, robzei'õ na 're aihâimana za'ra wa'aba mono õ di oto, a norĩ wa'wa hã. Tane nherẽ, Cristuhu ãma rowẽ na 're anomro aba mono nherẽ, ãne taré 'râwi asi'ãma 're rosa'rata za'ra wa'aba mono õ di za: Īwasédé te 're 'manharĩ mono nherẽ, rowẽ u'âsi wa za 're ĩhâimana. ãne taré 'râwi asi'ãma 're rosa'rata za'ra wa'aba mono õ di za. 'Re ĩhâimana u'âsi mono ma romhuri'wa, 're aihâimana za'ra wa'aba mono wa, te za aihâimana wẽ na 're aihâimana za'ra wa'aba mo. ¹⁷ ãne wa, te za dahâiba mono bâ 're ĩdahâiba wazéb za'ra wa'aba mo. Uburé asiré ĩsazei'wa norĩ hã te za 're ĩsawi pese za'ra wa'aba mo. 'Re ĩhâimana u'âsi mono hã te za duré asima 're ĩpipa za'ra wa'aba mo, ĩwaihu'u pese uptabi na. Duré ti'ai ãma danhipai u da'madâ'â'wa hã te za asiwi 're ĩhâiba wazéb za'ra wa'aba mo.

Pawa'âbâ õ nherẽ, romhuri'wa norĩ hã 're ĩnomro wẽ mono zé wasu'u

¹⁸ Aiwada'uri zarina aipawa'âbâ ãna dama romhuri'wa norĩ, asib'apito nhimiwada'urizé hã te za 're ĩwapari pese za'ra wa'aba mo, ĩsimizawi pese norĩ mreime hã, duré ĩsimizawi'õ norĩ mreime zama. ¹⁹ Taré nherẽ, da te aima 're rob'manharĩ za'ra wa'aba mono wamhã, te za 're ĩrobzépata za'ra wa'aba mo. ãne wamhã, ari'iwi te za 're aihâimana za'ra wa'aba mo, taha da, te te sima 're aiwẽ za'ra wa'aba mono wa, 'Re ĩhâimana u'âsi mono hã. ãne zarina te za te te 're aiwêsãmri za'ra wa'wa. ²⁰ Marĩ hã 're 'manharĩ wasété za'ra wa'aba mono wa, da te 're aihâ za'ra wa'aba mono

wamhã, ari'iwi 're aihâimana za'ra wa'aba mono nherẽ, e te za ai'ãma 're dawata za'ra wa'wa. Mare di. Aihâimana wẽ na dama 're aihâimana za'ra wa'aba mono nherẽ, da te aima 're rob'manharĩ za'ra wa'aba mono wamhã, ari'iwi te za 're ãsẽpata za'ra wa'aba mo. Tawamhã, 'Re ãhâimana u'ãsi mono si te za te te 're aiwẽsãmri za'ra wa'wa. ²¹ Cristu hã ma tô robzẽpata, asada za'ra wa'aba. Ta hã ma tô ãne na aima ãma asanho za'ra wa'wa, ãsirã zarina si ari'iwi 're robzẽpata za'ra wa'aba mono da. Taha da, ma tô sitẽme asô tihârã za'ra wa'wa, 'Re ãhâimana u'ãsi mono hã. ²² Cristu hã marĩ na tiwasédé te te 'manharĩ õ uptabi di. Tô sena na te te dama 're rowasu'u mono wa, sadawa nhipese na da te 're wapari mono õ di, dasiwi. ²³ Da te tãma 're nharĩ wasété za'ra mono nherẽ, asa te te dama ãma 're nharĩ wasété mono õ di. Duré da te tãma ãrob'manharĩ wasété mono na te te robzẽpata mono nherẽ, te te dama ropipa õ di asa. 'Re ãhâimana u'ãsi mono ma si, ma tô sisõ, taha si dahâimanazéb zarina da'ãma rowairébé'wai wa, te te ãma dama 're a'upai mono õ wa. ²⁴ Cristu hã wedepo'o nhonhi'rãmi na dã'ã wamhã, ma tô wawasété wa, wawa'ãbã za'ra, wawasédé hã wa te oto 're 'manharĩ tõ za'ra mono da, wahâimana wẽ na si oto 're wahâimana za'ra mono da. ãhãiba na da te tãma ãrob'manharĩ wasétézém na, ma tô robzẽpata za'ëtẽ. Taha zarina, a norĩ wa'wa hã rowẽ na te oto 're aihâimana za'ra wa'aba mo. ²⁵ Rowẽ na 're aihâimana za'ra wa'aba mono õ di aré, pone'ërebã, bãdãdi nhiti 're ãsipa za'ra mono ne, 're anomro aba mono wa aré. ãhãna ma tô apã aipizari za'ra wa'wa, Da'madã'ã wẽ 'wai u, ãsarina si oto 're anomro aba mono da, rowẽ na.

3

Damro ré norĩ hâimanazé wasu'u

1-2 Pi'õ norĩ, romhuri'wa norĩ hã tinhib'apito mreme te te 're ĩwapari pese za'ra mono ne, te za duré aimro mreme hã 're ĩwapari pese za'ra wa'aba mo. Āté aimro za'ra wa'wa hã zahadu te te saze za'ra õ di, 'Re ĩhâimana u'âsi mono nhimiroti hã. Tane nherẽ, tãma 're aihâimana wẽ za'ra wa'aba mono zéb zarina, te za oto sima wẽ za'ra, Cristuhu zazei'wa oto 're hâimana za'ra mono da. Te te 're saze za'ra mono da, tãma 're roti za'ra wa'aba mono õ nherẽ, te za uihâ na te te 're saze za'ra. E marĩ wa. Tãma 're aihâimana wẽ za'ra wa'aba mono wa, duré ĩmreme hã 're wapari pese za'ra wa'aba mono wa. 3-4 Asima 're asipese za'ra wa'aba mono na si, 're asõpré wa'aba mono õ di za, ai'rãĩ waipo ĩwẽ na, duré asõ'rebzu ĩwẽ na. Duré ai'uza ĩwẽ na 're rosa'rata za'ra wa'aba mono õ di za. Asimirosa'rata wẽ na oto 're ĩ'anomro aba mono zéb zô si, te za asima 're asõpré wa'aba mo, duré aiwaimri 're ĩ'aihâimana za'ra wa'aba mono zéb zô zama. Āne si tãma wẽ uptabi di, 'Re ĩhâimana u'âsi mono ma hã. 5 Āne si ma tô wahi'rata sipi'õ norĩ hã 're nomro, 're ĩhâimana wẽ za'ra mono norĩ hã. 'Re ĩhâimana u'âsi mono si, ma tô ta norĩ hã te te sina 're umnhasi za'ra, te te 're pawapto wẽ za'ra mono da. 'Re ĩnomro wẽ mono na, ma tô duré ta norĩ hã sina 're sõpré. Taha wa, ma tô timro mreme si te te 're wapari pese za'ra. 6 Āne Sara hã ma tô 're mo. Timro mreme hã ma tô te te 're wapari pese, Abra'ãhã mreme hã. Taha wa, ma tô tinhib'apito na te te 're sisi Sara hã, Abra'ã hã. Tane te za duré a norĩ wa'wa hã aimro ma 're aihâimana wẽ za'ra wa'aba mo. Asina aihâtâ'ã ãna, te za duré

're anomro aba mo. Tawamhã Saraha nhihudu na te za te te 're asisi za'ra wa'wa, 'Re ãhâimana u'âsi mono hã.

⁷ Duré aibã norĩ, aimro siré te oto 're aihâimana za'ra wa'aba mo. A norĩ wa'wa hã aibã wa, aihãiba hã siptete za'ra wa'aba di, aimro hãiba za'ra wa'aba ma hã. ãne hã te za asina ãwaihu'u za'ra wa'wa. Taha wa, te za aimro ma 're aihâimana wẽ za'ra wa'aba mo. Rowẽ ãsi'utõrĩ'õ hã te za 'Re ãhâimana u'âsi mono hã aima sõmri za'ra wa'wa, hãiwa ãma. Aimro norĩ wa'aba ma zama, te za sõmri za'ra. Taha wa, te za aimro ma 're aihâimana wẽ za'ra wa'aba mo. Tawamhã 'Re ãhâimana u'âsi mono ma, asiré 're aimreme zusi aba mono wamhã, te za te te 're ai'awapari 'wa, Wamama hã.

Ãsazei'wa norĩ, dama 're hãimana wẽ za'ra mono nherẽ, te te 're ãrobzépata za'ra mono zé wasu'u

⁸ ãmreme na wa za oto aima 'rãsutu za'ra wa'wa. Asimirosa'rata wẽ na te za aihãni 're asisazei pese za'ra wa'aba mo. Duré dapẽ'ẽzé zarina da te 're robzépata za'ra mono wamhã, te za dasiré aipẽ hã 're ãsépata za'ra wa'aba mo, aipẽ'ẽzé sina. Duré uburé marĩ wẽ na dama 're rowẽ za'ra mono wa, 're dato za'ra mono wamhã, te za dasiré 're ato za'ra wa'aba mo. Te za duré 're asisawi pese za'ra wa'aba mo. Asima aipire na 're aihâimana za'ra wa'aba mono õ di za. ⁹ Duré asada 're dahâimana wasété za'ra wa'aba mono wamhã, asa dama ãma 're wa'rãmi za'ra wa'aba mono õ di za, aihâimana wasété na. Duré dapẽ'ẽ na taré da te 're ai'ruiwapari za'ra wa'aba mono wa, da te aima 're nharĩ za'ra wa'aba mono nherẽ, asa dama ãma 're wa'rãmi za'ra wa'aba mono õ di za, aimreme wasété na hã. Wamama wi si, te za ta norĩ ma 're

ĩwaptẽrẽ za'ra wa'aba mo, ĩwẽ si te te tãma 're sõmri za'ra mono da, ta norĩ ma. ãne da, ma tõe Wamama hã sitẽme asõe tihãrã za'ra wa'wa, ĩwẽ na si aima 're sõprub za'ra wa'aba mono da. ¹⁰ Durẽihã ãne na ma tõe 'Re ĩhãimana u'ãsi mono zadawa wasu'u'wa hã dama roti:

“Aihãiba ré ré, robzei u'ãsi 're anomro aba mono da, asima 're wẽ za'ra wa'aba mono wamhã, aimreme wasété na dama 're nharĩ za'ra wa'aba mono õ di za. Durẽ dama 're asadawa nhipse za'ra wa'aba mono õ di za.

¹¹ Te za durẽ aiwasété wi 're aipizari za'ra wa'aba mo, ĩwẽ si dama 're 'manharĩ za'ra wa'aba mono da oto. Durẽ rowẽ na si asirẽ 're aihãimana za'ra wa'aba mono da si, te za asina 're ĩrosa'rata pese za'ra wa'aba mo.

¹² Hãimana wẽ na dama 're ĩhãimana za'ra mono norĩ si, te za te te 're ab'madá'ã pese, 'Re ĩhãimana u'ãsi mono hã. Te te durẽ tiwi 're rowaptẽrẽ za'ra mono wamhã, te za te te 're awapari, ĩmreme zarina te te tãma ãma 're a'uwaimrami mono da. Tane nherẽ, dahãimana wasété na dama 're dahãimana za'ra mono wamhã, te za dazada 're hãimana.”

ãne ãma ĩrob'ui'ére hã, ĩbaihã na hã.

¹³ A norĩ wa'wa hã 're anomro wẽ wa'aba mono da, tõe sena asina 're rosa'rata za'ra wa'aba mono wamhã, e 'wa hã te za rowasédé hã te te aima 're 'manharĩ za'ra wa'wa. ¹⁴ Tane nherẽ, dama 're aihãimana wẽ za'ra wa'aba mono nherẽ, taré da te aima 're rob'manharĩ wasété za'ra wa'aba mono wamhã, dama 're aipahi za'ra wa'aba mono õ di za. Asimirosa'rata na 're aihãitã'ã za'ra wa'aba mono õ di za durẽ. ¹⁵ Cristu hã Asib'apito

aima 're hâimana za'ra wa'aba mono wa, te za aihâimana prédup sina 're ãwapari pese za'ra wa'aba mo. Duré Cristu 're ãsaze za'ra wa'aba mono zém na, da te 're asadhanarĩ za'ra wa'aba mono wamhã, awa'awi te za dama 're asiwasu'u waré za'ra wa'aba mo. ¹⁶ Aiwaimri te za 're asiwasu'u za'ra wa'aba mo, aimreme wasété ãna. Aihâimana wẽ na te za dama 're aihâimana za'ra wa'aba mo, asimirosa'rata wasété na 'rãwi 're asiwẽ'õ za'ra wa'aba mono tõ da. Tawamhã dama 're aihâimana wẽ za'ra wa'aba mono wamhã, Cristuhu zazei'wa 're aihâimana za'ra wa'aba mono 'ru te, taré da te aima 're nharĩ wasété za'ra wa'aba mono nherẽ, te za damreme niwĩ 're danhiséb za'ra. ¹⁷ Áté 're aihâimana wẽ za'ra wa'aba mono 'ru te, te za da te aima 're rob'manharĩ wasété za'ra wa'wa. ãne zarina, 're robzépata za'ra wa'aba mono wamhã, te za ãwaihu'u za'ra wa'wa, 'Re ãhâimana u'ãsi mono te te sima 're aiwẽ za'ra wa'aba mono zéb zarina, a'ã 're ãrobzépata za'ra wa'aba mono na. ãne hã te te wama 're awẽ mono õ di, dama 're ãwahâimana wasété za'ra mono zéb da hã. Dama 're wahâimana wasété za'ra mono wamhã, áte te za da te 're wahã za'ra. ãne zarina, wa te 're robzépata za'ra mono wamhã, ã'uwaibaba wa za tô wa te 're robzépata za'ra. ¹⁸ Misi haré ma tô Cristu hã dazada dârã, 're ãdahâimana wasété za'ra mono hawi, te te 're da'anho'reptui mono da. 'Re ãmorĩ wẽ uptabi hã ma tô dârã, 're ãdanomro wasété mono norĩ da, te te 're wa'anhimroi mono da, 'Re ãhâimana u'ãsi mono u. Cristu hã dâ'ã uptabi nherẽ, ma tô ãmama hã hãiwa'utu, apã 're hâimana u'ãsi mono da. ¹⁹ Tihãiba na u'ãsi, te adã'ã norĩ u mo, dazazéb 're, 're ãdasimasa mono ne, nimomo 're ãwairébé mono õ norĩ u. Uburé Danhib'apito uptabi na te

te sina po're pu'u za'ra da, te ãtẽme timorĩ za'ra. ²⁰ Ta norĩ hã Nowé ti'ai ãma 're morĩ ré, te te 're wapari za'ra mono õ di, 'Re ãhãimana u'ãsi mono nhimiroti hã. Nowé hã 'ri ne uba're, te te 'manharĩ ré, te ta norĩ hã po're ãna 're nomro. Tane nherẽ, da'ãma wa'a su'u õ wa, te te da'uprosi su'u õ di, 'Re ãhãimana u'ãsi mono hã. Te te oto da'uprosi wamhã, 'ri ne uba're wa, ãsisisi norĩ si, ma â wi sõ'reptu za'ra. Ta norĩ hã umro za'ra di. 8 na ãhãiba za'ra hã. ²¹ Ta hã â hã, â dawabzuri, te wasu'u, danho'reptuzé. E da'u're wa, da'upsõzé, te â dawabzuri hã wasu'u. Mare di. 'Re ãhãimana u'ãsi mono ma, da te dasi'ãma 're ãropisutu za'ra mono zé te wasu'u, â dawabzuri hã. Dawasédé te te dama 're aparĩ mono wa, 'rãwi 're dasiwaihu'u za'ra mono õ di oto, dawasété na hã. Taha wa, dama 're ãrowẽ za'ra mono zéb zarina, te za oto dasina da te tãma 're ropisutu za'ra, ãma 're ãdanomro mono zéb da hã. Zezu Cristu hã dã'ã uptabi nherẽ, ãmama hã ab're hawi te te hãiwa'utu wa, apã 're morĩ wa, te asõ'reptuzé hã aima tihãimana za'ra wa'wa. ²² Cristu hã hãiwa u morĩ wa, te oto pire na Timama nhimire niwĩ 're sãmra, Danho'reptui'wa hã. 'Re ãhãimana u'ãsi mono ma romhuri'wa norĩ 'madã'ã'wa, te 're hãimana. Uburé hãiwa nho're ãma, pire na duré waihu'u pese na 're ãhãimana za'ra mono norĩ ma zama, te pire uptabi na tãma 're hãimana za'ra.

4

'Re ãdanomro mono zép tém na rowasu'u

¹ Cristu hã ma tô tihãiba na robzépata. Taha wa, te za asina 're asiptete za'ra wa'aba mo, asihãiba

zawi ãna, ãsine 're ãrobzépata za'ra wa'aba mono zéb da hã. ãne, da te 're robzépata za'ra mono wamhã, marĩ, da te 're ãmanharĩ wasété za'ra mono zé hã, te za oto da te 're rême pese za'ra. ² Taha wa, ti'ai ãma 're aihãimana za'ra wa'aba mono ré, te za 're aihãimana wẽ za'ra wa'aba mo, 'Re ãhãimana u'ãsi mono te te sima 're ãwẽ mono zéb zarina si. Duré marĩ na asima 're ãrosa'rata wasété za'ra wa'aba mono zéb zarina, 're aihãimana za'ra wa'aba mono õ di za oto. ³ Wahub ahã na ma tô ai'ãma 're si'utõrĩ za'ra wa'wa, 'Re ãhãimana u'ãsi mono nhimiroti waihu'u'õ'wai hãimanazém na, 're aihãimana wasété za'ra wa'aba mono ré. Ma tô asisõ 're ãrowasutu za'ra wa'aba mo aré. ãzézei'wa te aré 're anomro aba mo. Duré dato ãwẽ'õre hã 're 'manharĩ za'ra wa'aba mono ré, ma tô asina 're asipsaihuri za'ra wa'aba mo aré. Duré ãzézei'wa 're aihãimana za'ra wa'aba mono wa, ma tô ai'rã siwamnarĩ na 're aihãimana za'ra wa'aba mo. Duré 'Re ãhãimana u'ãsi mono upana, ma tô romhãiba 'manharĩ ãma 're aiwata za'ra wa'aba mo, ta hã waihu'u pese newa rob'manharĩ hã. ⁴ Re anomro wasété aba mono zé hã, tâibã oto. Taha wa, siwa'ru dasiré 're aihãimana za'ra wa'aba mono õ wa, te ai'ãma 're tob'uzu za'ra wa'wa, Wamama nhimiroti waihu'u'õ'wa norĩ hã. Taha wa, 're aihãimana wẽ za'ra wa'aba mono 'ru te, te oto ta norĩ hã taré te te aima 're nharĩ wasété za'ra wa'wa. ⁵ Tane nherẽ, nimahã na ta norĩ hã 're ãhãimana wasété za'ra mono zém na te te ãwaihu'u za'ra zéb zarina, te za ta norĩ ma rowairébé za'ra, 'Re ãhãimana u'ãsi mono hã. Ta hã te te ãda'awaihu'uzéb zarina, te za romhutu na uburé norĩ ma rowairébé, ãhãiba ré norĩ ma, 're ãdã'ã za'ra mono norĩ ma zama. ⁶ Taha wa, dahãimanazém na za te te dama 're arowairébé mono wa, ma tô Wanhib'apito zadawa wasu'u'wa

norĩ hã Cristuhu wasu'uwẽ na te te 're dapo're pu'u za'ra, da te ãma 're saze za'ra mono da. Ta norĩ wapari'wa norĩ hã ma tô oto tidâ'â za'ra. Ti'ai ãma 're nomro mono ré, ma tô ïwasété na wẽ'õ za'ra, 'Re ïhâimana u'âsi mono hã, uburé 're ïdahâimana za'ra mono norĩ hã ïwasété na te te 're ï'awẽ'õ mono ne. Tane nherẽ, hãiba ré 're nomro mono ré, ma tô Wanhíb'apito zadawa wasu'u'wa norĩ hã Cristuhu wasu'uwẽ na po're pu'u za'ra, ta norĩ hã rowẽ ïsi'utõrĩ'õ ãma 're hâimana u'âsi za'ra mono da, 'Re ïhâimana u'âsi mono ne.

'Re dasipawaptob za'ra mono da, dama ïrotizé

⁷ Ro ïsi'utõrĩzéb u hã, romhuture di oto. Taha wa, te za aihâiba na asina 're asiptete za'ra wa'aba mo. Duré aihâimana nhimiza'rese te za 're aihâimana za'ra wa'aba mo, 'Re ïhâimana u'âsi mono ma, 're aimreme zusi u'âsi aba mono da. ⁸ Dazawizé wasu'u si, ïpire uptabi hã. Taha zarina si, 're asisawi pese za'ra wa'aba mono sina, te za 're aihâimana za'ra wa'aba mo. E marĩ da. Dazawizé hã aima 're hâimana za'ra wa'aba mono wa, dawasédé hã da'ãma 're 'madâ'â za'ra wa'aba mono tõ da, ahâ nherẽ, da te 're 'manharĩ za'ra mono nherẽ, dawasédé hã. ⁹ Te za duré 're ïda'mazasi su'u za'ra wa'aba mo ari'iwi, 're dawataẽ za'ra wa'aba mono ãna. ¹⁰ 'Re ïhâimana u'âsi mono hã sõpru wa, ma tô aihâiba mono bâ dama 're ïromhuri za'ra wa'aba mono zéb da hã, aima sõmri za'ra wa'wa, sipu'u pese na. Taha zarina si, te za oto dama ãma 're ï'uwaimrami za'ra wa'aba mo. ¹¹ Tawamhã dama 're rowahutu za'ra wa'aba mono wamhã, duré dama 're roti za'ra wa'aba mono wamhã, timreme te te aima 're ïsõmri za'ra wa'aba mono na si, te za dama 're ïrowasu'u za'ra wa'aba mo. Duré aihâiba na

zama 're dapawaptob za'ra wa'aba mono wamhã, 'Re ãhâimana u'âsi mono, tinhiptede te te aima 're ãsõmri za'ra wa'aba mono na, te za 're ãdapawaptob za'ra wa'aba mo. Æne na hã te za dama ãma 're ãuwaimrami za'ra wa'aba mo, 'Re ãhâimana u'âsi mono ãma 're dawata za'ra mono da, Zezu Cristuhu nhib'a'uwẽ 're aihâimana za'ra wa'aba mono wa, dama ãma 're ãuwaimrami za'ra wa'aba mono zẽm na. 'Re ãhâimana u'âsi mono hã wẽ uptabi wa, durẽ waihu'u pese uptabi wa, wa za ãma 're wawata u'âsi za'ra.

Wanhib'apito zazei'wa norĩ te te 're ãrobzẽpata za'ra mono zẽ wasu'u

¹² ãsiwadi norĩ, ãma asawi pese za'ra wa'aba norĩ hã, ãhãna rowasẽdẽ hã da te aima 're 'manharĩ za'ẽtẽ za'ra wa'aba mono wa, te a'ã 're ãrobzẽpata za'ra wa'aba mo. Tane nherẽ, 're ãrobzẽpata za'ra wa'aba mono zẽm na ãma 're atob'uzu za'ra wa'aba mono õ di za, da te aima 're rob'manharĩ za'ẽtẽ za'ra wa'aba mono õ newa. ¹³ Cristu hã aiwana za'ra wa'aba, ma tõ robzẽpata za'ẽtẽ. Taha wa, ãsine 're robzẽpata za'ra wa'aba mono wa, te za aipẽ'ẽ 're, 're ato za'ra wa'aba mo. E marĩ wa. Cristu hã tiwaihu'u pese na apã wei morĩ wapsi, za ato za'ẽne hã aima 're hãimana za'ra wa'aba mono wa. ¹⁴ Ætẽ Cristuhu ãma si 're aihâimana za'ra wa'aba mono 'ru te, te za da te aima 're nharĩ wasẽtẽ za'ra wa'wa. Tane nherẽ, aima 're rowẽ za'ra wa'aba mono di za. E marĩ wa. 'Re ãhâimana u'âsi mono pẽ'ẽzani hã aipẽ'ẽ 're aima 're hãimana za'ra wa'aba mono wa oto, rowẽ uptabi zẽ hã. ¹⁵⁻¹⁶ Cristuhu zazei'wa oto 're anomro aba mono nherẽ, 're danhimroi wa'aba mono õ di za. Durẽ marĩ na dawĩ 're asipsaihuri za'ra wa'aba mono õ di za. Durẽ

marĩ na dawĩ 're ro'wa'rutu za'ra wa'aba mono õ di za. Duré danhimirosa'rada hã dawĩ 're 'wa'rutu za'ra wa'aba mono õ di za. Até nimahã na dama 're aihâimana waseté za'ra wa'aba mono wamhã, te za da te aima 're rob'manharĩ waseté za'ra wa'wa. Āne zarina, 're robzépata za'ra wa'aba mono wamhã, ĩ'uwaibaba te za tô 're ĩrobzépata za'ra wa'aba mo. Tane nherẽ, Cristuhu zazei'wa 're anomro aba mono 'ru te, 're robzépata za'ra wa'aba mono wamhã, 're aséb za'ra wa'aba mono õ di za. Cristuhu zazei'wa na, da te 're asisi za'ra wa'aba mono wẽ te, te za 'Re ĩhâimana u'âsi mono ãma si 're aiwata za'ra wa'aba mo.

¹⁷ Bâdâ hã ma tô oto ĩwa waptãrã, 'Re ĩhâimana u'âsi mono hã te te dama ĩ'arowairébézéb da hã, ta hã dahâimanazém na dawaihu'u'wa 're hâimana mono wa. Taha wa, te za a'â tinhib'a'uwẽ norĩ ma arowairébé, 're ĩwahâimana za'ra mono zém na, te te wa'awaihu'u wa. Tawamhã e niha za ĩsazei'õ'wa norĩ ma te te ĩrowairébézé hã. Wanhib'apito wasu'uwẽ na, 'Re ĩhâimana u'âsi mono, we te te dama ĩwaihu hã te te ãma saze za'ra õ wa dame, ta norĩ ma, 're rowẽ za'ra mono õ di za.

¹⁸ Duréhã ãhã wasu'u na ma tô ãne na dama rowasu'u, 'Re ĩhâimana u'âsi mono zadawa wasu'u'wa hã:

“Áté marĩ ahã na te za sada 're hâimana za'ra, 're ĩnomro wẽ mono norĩ zada hã, tinho'reptuzé hã te te sina 're uwaimrami za'ra mono õ ré. Tawamhã e niha te za tãma 're romhâimana za'ra, 'Re ĩhâimana u'âsi mono wẽ'õ'wa norĩ ma hã, siwa'ru 're ĩhâimana za'ra mono norĩ ma hã.”

Āne ta norĩ wasu'u na rob'ui'ééré hã, ĩbaihã na hã.

¹⁹ Até wa za a'â robzépada hã wa te wasina 're 'madâ'â za'ra, 'Re ĩhâimana u'âsi mono te te

wama 're ĩ'awě mono zéb zarina. Tane nherẽ, 'Re ĩhâimana u'âsi mono, wa'apoto mono 'wai umnhasi sina, wa za dama 're wahâimana wẽ za'ra, ta hã tinhimiropisutu wẽ na za te te wama ãma 're a'uwaimrami u'âsi mono wa.

5

Wanhib'apito zazei'wa 'madâ'â'wa norĩ ma rowasu'u

¹ Da'madâ'â'wa norĩ, ãhãna wa za aima ĩsiwasu'u za'ra wa'wa. Wa hã da'madâ'â'wa, wa duré 're ĩhâimana. Cristu hã te te robzépata wamhã, wa tô ĩtômo na 'madâ, te te ĩrobzépatazé hã. Wa hã wa za duré ĩsazei'wa norĩ siré, rowẽ uptabi hã ĩsina waihu'u hãiwa ãma, rowẽ uptabi hã sô'awi te te wama pisutu za'ra wapsi, Wanhib'apito hã.

² Taha wa, wa za aima waihu'u za'ra wa'wa, 'Re ĩhâimana u'âsi mono hã tinhib'a'uwẽ te te aima 're ĩpisutu za'ra wa'aba mono hã ato sina tãma 're pawaptob za'ra wa'aba mono da, tãma 're aiwa'a za'ra wa'aba mono ãna. ãne da, ma tô sima aiwẽ za'ra wa'wa, Wamama hã. Rob'uiprazéb zô tãma 're dapawaptob za'ra wa'aba mono õ di za. Tô sena asima 're ĩwẽ uptabi za'ra wa'aba mono zéb zarina si, te za tãma 're ĩdapawaptob za'ra wa'aba mo.

³ Asimi'madâ'â za'ra wa'wa hã tãma 're 'madâ'â pese za'ra wa'aba mono da, ma tô aipisutu za'ra wa'wa, 'Re ĩhâimana u'âsi mono hã. Taha wa, a norĩ wa'wa hã dama aipire wẽ te, 're dawada'uri za'ra wa'aba mono õ di za. Asimipawapto wẽ na te za tãma ãma 're asanho wẽ za'ra wa'aba mo, asimi'madâ'â za'ra wa'aba norĩ ma. ⁴ Tawamhã Da'madâ'â'wai uptabi hã apâ wei morĩ wapsi, tãma 're ĩdapawapto wẽ za'ra wa'aba mono zé wa'rãmi,

te za oto aima wa'âbâ za'ra wa'wa, ïwẽ uptabi na, ïsi'utõrĩ'õ na oto aima 're hâimana u'âsi za'ra wa'aba mono da.

⁵ Ïpréduptém norĩ, ïprédum norĩ mreme si te za 're ïwapari pese za'ra wa'aba mo. Ïsazei'wa norĩ, aihĩni te za romhuri na 're asipawaptob za'ra wa'aba mo, aipire na 're asi'madâ'â za'ra wa'aba mono ãna. Duréihã ãne na ma tô rob'ui'ééré, 'Re ïhâimana u'âsi mono zadawa wasu'u'wa hã:

“Dapire na 'râwi 're ïdasi'madâ'â za'ra mono norĩ da si, te za 're hâimana, 'Re ïhâimana u'âsi mono hã. Dapire na 'râwi da te dasi'âma 're ïrosa'rata za'ra mono õ norĩ si, te za te te 're apawaptob u'âsi.”

Ãne ãma rob'ui'ééré hã, ïbaihã na hã.

⁶ Ãhã wa, te za Wamama ma 'râwi aiwapu na 're asi'madâ'â za'ra wa'aba mo, taha si waihu'u pese uptabi na 're hâimana mono wa. Ãne wamhã, bâdâ te te ai'ãma sima ïpisutuzém na, te za ai'ãma uwaimrami za'ra wa'wa, aipire na oto dama 're aihâimana za'ra wa'aba mono zéb da hã. ⁷ 'Re ïhâimana u'âsi mono hã te te 're ai'madâ'â wẽ za'ra wa'wa. Taha wa, marĩ na 're aihâtâ'â za'ra wa'aba mono wamhã, te za tâma 're asiwasu'u za'ra wa'aba mo, marĩ na 're ï'aihâtâ'â za'ra wa'aba mono zéb zarina. Taha parimhã, ãma 're rosa'rata za'ra wa'aba mono õ di za oto, marĩ na 're ï'aihâtâ'â za'ra wa'aba mono ãma hã.

⁸ Ma'âpé, aihâimana nhimiza'rese sina 're aihâimana za'ra wa'aba mono. Duré 're asi'madâ'â pese za'ra wa'aba mono. E marĩ wa. Da'rui'wa hã datême 're morĩ wa, wa'uburé norĩ nhib'apito hã. Hu'u zéré pa hã wairõ sina, tisa zô 're ïnomro mono ne, te datême 're morĩ u'â, Wanhib'apito si

da te dasina 're ĩ'madâ'â u'âsi za'ra mono zé hã te te dawi 're a'uprosi mono da. ⁹ Asiré Wanhíb'apito zazei'wa norĩ hã daro mono bâ 're hâimana za'ra mono 'ru te, da te tâma 're ĩrob'manharĩ za'ra mono zém na, te a'â te te 're robzépata za'ra, asine za'ra wa'aba. Ā norĩ wasu'u hã ma tô ĩwaih'u za'ra wa'wa. Taha wa, Wanhíb'apito umnhasi sina te za 're aihâimana za'ra wa'aba mo, da'rui'wai wi asina 're asiptete u'âsi za'ra wa'aba mono sina. ¹⁰ Tane nherē, 're robzépata hã za'ra wa'aba mono ô ré, rowēzé hã te za te te aima āma 're a'uwaimrami 'wa, 'Re ĩhâimana u'âsi mono hã. Taha si te za te te 're asiptete u'âsi za'ra wa'wa, tiwaih'u pese na, asiptete u'âsi āma 're aihâimana za'ra wa'aba mono da. Ōhō ma si te ĩsimizawizé hã sa'ētē na tâma 're hâimana. Taha wa, ma tô sitēme asō tihârâ za'ra wa'wa, rowē ĩsi'utōrĩ'ō āma ĩsiré 're aihâimana u'âsi za'ra wa'aba mono da, Cristuhu nhíb'a'uwē oto 're anomro aba mono wa. ¹¹ 'Re ĩhâimana u'âsi mono hã danhipai u dama pire uptabi na 're hâimana mono wa, wa za taha āma si 're wawata u'âsi za'ra.

Pedru te te ĩdazawizé wasu'u

¹² Sira hã ma tô ĩpawapto, aima ĩnhimiroti syry za'ra wa'aba nherē, te te aima rob'ui'ééré za'ra wa'aba da. Ta hã ĩsisānawã ne, te ĩma 're hâimana. Taha wa, ĩma umnhasi di. Wa hã wa tô ĩsima aiwē za'ra wa'wa, ĩnhimiroti na te aipawaptob za'ra wa'aba da, Wanhíb'apito āma si asiptete sina 're anomro aba mono da, 'Re ĩhâimana u'âsi mono nhimipawaptobzé hã asi'uihâ na asina 're waih'u za'ra wa'aba mono da. Taha wasu'u na si, wa tô te aima 're rowasu'u za'ra wa'wa, tô sena wa. Taha wa, te te 're aipawapto wē za'ra wa'aba

mono wa, te za asiptete sina ãma 're anomro aba mo.

¹³ Wanhib'apito zazei'wa norĩ hã, Babironiza na 'ri nho'õmo nhisi ãma 're ãhâimana za'ra mono norĩ hã, ma tô Wamama hã sima pisutu za'ra, ãsib'a'uwẽ oto 're hâimana za'ra mono da. Ta norĩ zama ma tô timreme na ãma asawi za'ra wa'wa. ã'ra na te 're ãsisi mono zama, ma tô duré timreme na ãma asawi za'ra wa'wa, Marcusi hã. ¹⁴ Tame te za uburé asiré ãsazei'wa 're aihâimana za'ra wa'aba mono wa, asõ'utu na asisawi sina 're asitob'rata hârâ za'ra wa'aba mo.

Cristuhu nhib'a'uwẽ norĩ, rowẽ na ãma 're aihâimana za'ra wa'aba mono da si, wa aima za'ra wa'aba te tiwi 're rowaptêrẽ u'âsi, Wamama wi.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

744f0b3a-210f-53c7-b3a1-39b62617ba0c